


CELEBRACIÓN EN OS COTOS (na igrexa)

21 – 22 de agosto do 2021

XXI DOMINGO DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO DA COMUNIDADE

SAÚDO DE BENVIDA

🎵 n° 3 *Unha xuntanza de amor*

Celebrante:

Benvidos sexamos todos a esta celebración da nosa fe. Reunímonos para compartir a Xesús e a súa Palabra de Vida en comunidade; facémolo no nome do Pai e do Fillo e do Espírito Santo.

Hoxe a Liturxia pon diante de nós o noso compromiso libre, responsable e persoal de fe.

Xosué consulta ao pobo de Israel se quere servir ao Señor ou a outros deuses e contéstanlle que servirán ao Señor porque é o seu Deus.

Xesús tamén lles dá liberdade aos apóstolos para elixir se queren marchar ao igual que fixeran outros que non crían na súa Palabra.

Hoxe é a nós a quen interpela a celebración: queremos de verdade ser cristiáns? Cremos na Palabra de Xesús? Somos quen de concordar a fe e a vida de cada día ou somos cristiáns na igrexa e non fora dela?.

Son preguntas importantes ás que temos que dar resposta. A nosa fe ten que mostrarse no que vivimos cada día. Se queda soamente en boas intencións e non a acompañan as obras é unha fe morta.

ACTO PENITENCIAL

Celebrante: *A vida de Xesús demostranos que vale a pena compartir con todas as persoas dende a actitude do compromiso persoal de cada día. Pero moitas veces non sabemos respectar a liberdade dos outros, por iso hoxe, antes de máis nada, queremos pedir perdón e refacer a nosa relación con Deus.*

Monitor/a:

- Porque non facemos unha opción persoal e libre pola vida de fe. Señor, ten piedade de nós
- Porque vivimos unha fe chea de rutinas e canseiras. Cristo, ten piedade de nós
- Porque buscamos saciarnos lonxe de ti. Señor, ten piedade de nós

Celebrante: *Deus todopoderoso teña piedade de nós, dos que teñen un lugar no noso corazón e na nosa vida, e dos que non son capaces de tomar decisións con liberdade. A todos nos conceda o Señor o seu perdón e nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración pedíndolle a Deus que escoite todo aquilo que cada un de nós ten no seu corazón nestes momentos.*
(silenzo)

Celebrante:

Deus, Noso Pai, ti que es capaz de acordar as vontades dos teus fieis, concédelle ao teu pobo amar o que lle mandas e desexar o que lle prometes.

Fai que no medio dos cambios deste mundo nos manteñamos firmes na procura da felicidade que permanece, por Cristo, Noso Señor. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Monitor/a:

Na Palavra de Deus de hoxe o pobo de Israel dá resposta á chamada do Señor porque El é o seu Deus e comprométense a vivir segundo os seus mandatos.

No Evanxeo os apóstolos responden a Xesús: “A quen imos acudir se só Ti tes palabras de vida eterna”.

Vivir a fe é tomar decisións, é asumir persoalmente un xeito de vivir. A fe, ou se asume como decisión propia ou non é máis que un feixe de costumes que non enchen a vida. Escoitémolo.

Leccionario I B páx 234 **Xos 24, 1-18** LECTURA

LECTURA DO LIBRO DE XOSUÉ

Daquela xuntou Xosué a todas as tribos de Israel en Xequem, e chamou aos anciáns de Israel, aos xefes, aos xuíces e máis aos oficiais, e presentounos diante de Deus. E Xosué falou a todo o pobo deste xeito:

- Se vos anoxa servir ao Señor, escollede hoxe a quen ides servir: se aos deuses que serviron vosos pais na outra banda do río, ou aos deuses dos amorreos, os da terra que habitades. Eu e maila miña familia serviremos ao Señor.

E respondeu o pobo:

- "Lonxe de nós arredármonos do Señor para servir a outros deuses, pois o Señor, o noso Deus, fíxonos subir a nós e a nosos devanceiros da terra de Exipto, da casa do asoballamento, e fixo diante de nós aqueles grandes prodixios e protexeunos ao longo de todo o camiño que percorremos, e máis por todos os poboados por onde pasamos. Así que tamén nós serviremos ao Señor, pois El é o noso Deus.

Palabra do Señor

♪ 41 *Quen nos vai separar de Ti* SALMO

(en pé) *Leccionario I B pág 236 Xn 6, 60-69 EVANXEO*

PROCLAMACIÓN DO SANTO EVANXEO SEGUNDO XOÁN

Daquela moitos dos discípulos de Xesús dixeron:

- ¡Que dura é esta doutrina! Quen pode admitir tal cousa?
Comprendendo Xesús que os seus discípulos murmuraban do asunto, díxolles:

- Escandalízavos iso? E logo se visedes o Fillo do Home subindo a onde estaba antes? O espírito é quen dá vida, a carne non vale para nada; as palabras que eu vos falei, son espírito e son vida. E, aínda así, hai algúns de vós que non cren.

Pois ben sabía Xesús desde o principio quen eran os que non crían e máis quen o había de entregar. E proseguíu:

- Por iso téñovos dito que ninguén pode vir a min, se non llo concede o Pai.

Desde aquela moitos dos seus discípulos botáronse para atrás, e xa non andaban con el. Preguntoulles entón Xesús aos Doce:

- Vós tamén vos queredes ir?

Respondeulle Simón Pedro:

- Señor, e onda quen imos ir? Ti tes palabras de vida eterna, e nós cremos e recoñecemos que ti es o Santo de Deus.

Palabra do Señor

(sentad@s) gardamos uns instantes de silencio para acoller a palabra no corazón

Os apóstolos atopan en Xesús Palabras de Vida.
 PAI palabra de vida para sentirnos ben diante do Deus que nos quere
 IRMÁN palabra de vida que marca o camiño para facer realidade o proxecto de Xesús
 EVANXEO palabra de vida que nos descubre as pegadas a seguir para ser cristiáns de verdade
 AMOR palabra de vida que nos leva a dar unha man aos asoballados de hoxe
 COMUNIDADE palabra de vida que nos achega aos demais para compartir a fe



🎵 41 *Quen nos vai separar de Ti*

(en pé) PROFESIÓN DA FE
Celebrante: *Hoxe Cristo míranos aos ollos e esíxenos unha resposta, queremos seguilo?, confiamos nel?, proclamemos:*
Creo, Señor, pero aumenta a miña fe

Monitor/a:

Crede en Deus, o Pai,
que nos convida ao banquete da fraternidade?
Creo, Señor, pero aumenta a miña fe

Crede en Xesucristo,
que na Eucaristía se nos ofrece como alimento para construír o Reino?
Creo, Señor, pero aumenta a miña fe

Crede no Espírito Santo,
que alentando en nós, desbota dos nosos corazóns as rutinas e canseiras?
Creo, Señor, pero aumenta a miña fe

Crede na Igrexa,
comunidade que ao longo da historia descubre e proclama que só Cristo ten palabras de vida eterna?
Creo, Señor, pero aumenta a miña fe

ORACIÓN UNIVERSAL

Celebrante: *Rezamos a Cristo, o único que ten palabras de vida eterna, dicindo:*

SEÑOR, ATENDE A NOSA VOZ

Monitor/a:

- ✓ Mira, Señor pola túa igrexa, mantena firme na escoita da túa Palabra, oremos
- ✓ Mira, Señor, para os mozos e mozas das nosas parroquias e dálles coraxe para responder á chamada da fe con decisión e libremente, oremos
- ✓ Mira, Señor, aos pobos que sofren os horrores da guerra e non se respectan os dereitos e as liberdades, como Afganistán, e arrinca dos corazóns todo o que divide, oremos
- ✓ Mira, Señor, a aqueles que viven a fe de xeito rutineiro, aburrindo co seu testemuño aos demais, oremos
- ✓ Mira, Señor, polo país máis pobre de todos, Haití. Malviven na permanente miseria, sen futuro, sen a máis imprescindible dignidade, oremos

Celebrante: *Señor, atende a nosa voz, non nos deixes da túa man, pois sen ti non temos a quen ir. Ti que vives e reinas inmortal e glorioso por sempre eternamente. Amén.*

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Onda quen imos ir? Só Deus ten corazón de Pai, proclamémolo coa oración que Xesús nos ensinou:*

NOSO PAI ...

SIGNO DA PAZ

Celebrante: *A decisión persoal por vivir a nosa fe leva consigo transmitir a paz de Deus uns cos outros. Neste momento que esperamos a paz de Deus nos nosos corazóns, desexemos que os demais poidan percibir tamén esa paz na súa vida.*

COMUÑÓN

Celebrante: *Xesús reúnenos arredor da mesa da Eucaristía para que o descubramos no pan compartido cos irmáns. Só El pode saciar as nosas fames de eternidade e dun mundo mellor para todos.*

Ditosos nós que hoxe somos convidados a esta mesa do Señor.

Señor, eu non son merecente de que entres no meu fogar, mais unha palabra túa abonda para me salvar

 **nº 56 Ide e pregoade**

